

漁
墅
類
稿

欽定四庫全書

漁野類稿卷五

宋

陳元晉

撰

記

潭州州學先賢堂記

濂溪先生上承孟氏之傳傳明道伊川二先生而道益明祠於學舊矣龜山楊先生文定五峯二胡先生晦庵朱先生南軒張先生見知聞知發明衛翼之功尤大其附之祠則潭其所游居云爾祠寓稽古閣之翼室余來

眡事三日謁先聖已則謁先賢顧瞻位置湫隘面勢黷
昧大懼不足以竭虔教敬規易置之多事未皇也越明
年五月上印將行會帑有羨相先聖廟門之右得隙地
縱十丈橫半之草莽藂翳下為汚池然嚮南明敞平治
而埤益之作祠為宜遂出錢緡三千米石二百委善化
令趙君汝淑文學雷君必奮共圖之且俾以故侯西山
真先生列之祠十月趙君以書來告迺七月朔肇役庀
徒焚巖翦蕪疏如決汚築嬴千夫厥基砥如立堂三楹

延宇垂阿繚以修廡屏以崇閤工堅材良鉅麗宏壯可
百年不壞也余方歸憇武夷山中士友岔集客有詰余
者曰潭非昔康裕比城復於隍戎復於莽托裏捍表護
有慮無是所急也苟力之紓釋此不虞而顧彼之圖子
非迂乎余曰邇謀若切遠猷若迂其來尚矣雖然艱難
危急之秋衆心成城以理義之強也無競維人以衆善
之助也學術明則人心正師道立則善人多潭之民以
淳古稱士以節義著其質厚其志美牖之以學而表儒

先以風之俾民若士以瞻以儀良心興起而知人之所
以貴於物中國之所以別於外夷者必尊君必親上可
殺可辱而不可與為亂出而立乎人之本朝有陳義秉
法之風有首公犯難之操誠死社稷誠死封疆使姦邪
閉息而緩急有所怙其闕繫顧不重乎是則師帥之事
區區所為作祠之意客乃謝不及因書以遺趙君俾刻
之石以諭學者焉

廣州州學序賢亭記

淳熙初元詔州縣學立射圃獨嶠南以荒遠無應令越
五十年而南海郡博士許君巨川始克為之相地番山
之趾散蕪輦穢增庫夷高抗侯於西締亭於東凡費錢
十萬出於君所捐與帥守應純之所佐者各半之亭成
扁曰序賢侯又以弓矢贈君乃率諸生合射非籍於學
非齒於鄉而徒以藝進者不與其寮陳元晉適以校文
聯事觀其成諸生進而以記請辭不獲則為之誦所聞
曰周官六藝射次禮樂澤宮所差諸侯由此其選以射

教士尚矣而羿之善稱於天下卒不為孔孟所予何哉
古之射禮擇耦為先公罔之表序點揚解而延堵觀之衆不
肖者却而未純於善者恧不敢進惟執德信道之篤者
在焉故吾夫子所與揖升下飲者皆賢也而方矢云乎
哉苟夸藝而不貴德則號猿貫虱折翼附膚者控弦而
登而洙泗及門或羣形其絀矣而可乎許君飾已以先
物康色以誘善吾黨浩然歸重而臺閭敬信之由是聲
應氣合學政畢舉創小學廣弟子員增歲廩之租補度

藏之籍講鄉飲之禮飾丁祭之服矣而又以餘力及此
且表亭示訓為諸生勸其用力勤其存心忠諸生其何
以稱繼自今日脩身為子矯思為矢立義為的定而後
發春秋游藝借之以驗行事曰凡吾平日所為果若賢
歟果足稱先生所序歟若是而面正鵠布武此亭可無
愧色行有不慊於心則望矍相而返者心誠求之益求
所以稱所序雖不中不遠矣諸生曰諾請以是為記嘉
定昭陽協洽歲除月望日文林郎廣州增城縣丞臨川

陳元晉記

汀州卧龍書院記

紹定二年閩寇自汀之潭禍延邵劔聲震建福漳泉之間明年四月通判安豐軍事李公華被命護淮西軍討捕首會招捕使陳公鞞決策所向公謂賊之根源於潭飛招賢者腹心也流漫於數郡十餘縣者四支也潰其腹心則四支不能振掉矣時賊方四出公自延平轉戰而前指賊之巢穴為的賊歸則邀擊來則迎勦將士用

命遇賊則克南擣招賢之墟北夷潭飛之窟兌渠失據
次第就擒而閩寇之大勢定矣初寇亂方殷汀卒闖隙
陵守將為暴内外交急人心搖搖公詭辭調温陵戍兵
來汀已密布靖内之畫至是入攝郡事首亂伏誅一塵
不驚民之惴不自保者乃克復有其家室天子嘉之命
公為真公當師旅飢饉之餘簡節踈目輯散鳩亡威暢
惠孚人和歲稔退食之暇考圖訪古知郡後山麓故有
卧龍亭者蓋因山取名歲久圯矣獨陳公元輿之詩在

猶膾炙人口觸境興懷庀工肇役相郡西偏為堂三楹
前榮後室翼以兩廡扁仍亭舊曰卧龍書院而刻諸葛
忠武侯遺像於其間圖八陣竒正之勢書王業不偏安
漢賊不兩立語於左右壁而朝夕瞻敬以寓願學思齊
之意蓋不徒存故迹侈後觀也則遺書屬元晉記之元
晉惟疇昔番禺幕府與公為寮相得最深風簷握手月
牖對床劇談世事往往至夜分嘗相與竊嘆今世之士
氣卑論弱不以厚處其身觸事畏縮惴惴若不可為者

顧余無挾妄行擬步輒躡方自退省而公敏識強力易人所難功立名顯且以昔賢之遠且大者自期此余所媿而樂為天下道者焉敢以固陋辭夫靈於物而為人秀於民而為士凡宇宙內事皆吾分內事也苟一物之不體則吾身為不仁古之人視民饑溺由已所致弗克俾后為堯舜則若槌於市蓋士之一身其任重固如此而非曰食君之祿則懼其以不任事為辜耳而况大義未伸四郊多壘事會方來顧沈酣於生死醉夢之境頑

然而弗之思可乎公受任驅馳不肯以賊遺君父謀畫
夙成機警捷出料事制變卒潰於成固已賢於人遠矣
然猶慨慕忠武侯之風而竊有志焉其知士之所以為
士者歟雖然有闕大廣博之思必有斂退密察之功有
激昂奮發之志必有沈重靜專之守忠武侯之風烈炳
然與日月爭光固其志略所就然友元直拜德公尚賢
好善休休有容其蓄德甚裕也集衆思廣忠益惟恐已
有纖芥之闕其處已甚嚴也躬耕草野無意聞達身都

將相所欲不存視天下無一足以動其心者其操持甚
固也然則忠武侯之所以抗志明義不撓不折足以質
諸天地而不慙者豈夸詡之為哉要有為之本者矣故
因公之請輒誦所聞而致朋友切磋之義焉公於余言
莫逆儻以為然乎公字實夫建安人為辛未進士以功
擢大理寺簿今以直寶章閣守郡云六年正月既望臨
川陳元晉記

翁源縣令廳壁記

余與李實夫為辛未同年後十一年會於羊城又為同
幕時翁源令闕諸司推實夫能議辟上余愛實夫之才
之竒謂不應深入瘴重處實夫笑曰今仕者每患五削
不易得故抗走塵俗惟視上官色可否脅息不敢喘同
列矛戟相向見便則奪權要之門苟可梯媒如蟻慕羶
如蚋聚醢不復顧惜名義使其氣餒精搖為身之殃心
之病者甚於瘴也革誠未能忘情斯世使得一山水縣
治之為可扳功令為脫選計其吾心休休焉出則勤於

民入則休於書比及三年神全守固無愧忤於俯仰間
猶將使窮林深谷匹夫匹婦皆無所疾苦瘴焉能病予
哉於是辟上不辭命下即日就道未幾政聲獵獵日起
婢妾得職流徙復業僵植壞修百廢具舉隱然為韶五
邑寂兩臺交薦之且通籍殿中矣蓋不惟實夫之才術
足以自著而其識趣夏出流俗之表為難能也又三年
余需次里中實夫遣介走千二百里來告縣治之成且
曰翁源舊無壁記父老黃汝旻多能言舊事暇日帥僚

佐載酒訪之得乾道乙酉以來宰者姓名自張君教而下十有五人乃壽諸石以補闕典敢求數語鏡其上噫實夫之敏於事雖其小者不苟如此故予不復為漫衍而直書實夫所以來翁源之意以告後之君子毋徒曰小邑寡民云耳皇上踐阼之初元八月既望宣教郎新慶元府奉化縣主管勸農公事兼兵馬監押臨川陳元晉記

崇安衢川橋記

徽猷建安李公上長沙帥印將行謂某曰距崇安東南
三十里有石巋然拔起曰劔巖又南行十餘里號建平
有水合流於巖之兩腋曰衢川余族姓居焉蓋三百餘
年里人因名李衢又數里許曰衢峽相距三十丈而羸
兩山唵呀壁立斗絕中通一水湍激如箭故有橋而屋
其上則余叔父南雄使君某所作也歲久橋朽而屋且
燬霖潦淫溢則行旅重足倚擔噉渡不得濟余欲更造
久之前年夏出嶺留贛族兄富復以是請余摸索索中

俸餘可辦此役則諉富歸而相其地地初屬南雄諸孫至是合辭願以地佐余於是練日得卜肇役庀徒工役謹趨不勤鄉閭輦石埤址障狂墉如飛梁作宇塞空翼如繫衢川有橋子其為我書之某曰今人乍見孺子將入井匍匐往捄非要譽於鄉黨朋友而螻蟻可憐猶編橋活之心誠厚於仁也公疇昔浚湟川莫閩嶠濡清江此手所活多矣則視里中之墊溺者能恕乎抑某竊有感焉有南雄則無橋而能有橋有微猷則橋廢而復有

橋衢川顧不以李姓重乎鄉里有巨人長德河潤山暉
漸被實多興利除疾嘉賴實衆獨一橋云乎哉今之士
固有慰題橋之願則褫印綬澤輿馬徒以耀桑柘為榮
苟可梯已植私為穿為壑以患苦其鄉黨鄰里而不嘖
其顏者視公用心為何如夫薄於所厚何所不薄能援
天下之溺者固利鄉邦一念所推也公曰是我心之所
同然者筆是為記可也橋經始於某年某月越某日而
告成厥費為幣若干緡云

贛州清平堂記

代李實
夫撰

清平有堂識余喜也喜者何志民不志功也端平三年
三月夏南安峒丁踰嶺掠韶雄屬厭而還余方上廣漕
印奉詔奏事道間被命布憲江右仍領贛事丞相書趣
疾驅余不敢辭詣所部則賊招矣余幸蒙成而亦不能
不過計狼子野心不一大治使得氣去復利導之懼有
後憂居無何挾仇交兵包藏嘯呼圍視欲起者踵告矣
調解開釋倏聚忽散而鄴寇作時贛兵出援永新戍上

猶王安民嗾許彭乘虛首禍一日飄忽入贛謀趨吉以
合鄆寇余亟趨廬陵兵沂萬安逆塞賊衝伐謀也又默
計尺藉中無可使者然坐視其恣肆而莫之撻則賊易
我滋甚乃出帳前淮校夜射賊營賊驚且遁量時度力
人人言招之便余不謂然帷幕下士陳元晉曰兵以氣
作少可擊衆着着中機會能速集事則財不至甚費能
如此則滅賊不難與余意合遂決征謀首汰鄉人之尸
將官而避事者立幟庭下揭醲賞以募死士余親簡視

而與之約凡十人為隊行則相保任戰則相救護一人死則九人相連坐先登得雋賞如格且刺填禁卒額衆聽令已超距截髮誓以死往適會昌強勇瑞金雄武雱都平頭南康蓮塘之軍皆集悉付池司任思定俾跡賊所在追捕復捐緡錢二千委南康令戴翼搞義丁為犄角助賊之出也四面鷲匿狙伏之姦方覘我利鈍以決作息計非萬全不可賊出彌旬矣料其氣竭歸必不整出其不意擊之必克任思定者從軍久未登勇爵取夙

皮告身馳一介持諭思定能取疾走賊所有功即授之
思定感激亟進王溪與賊遇鼓勇直前一勦千餘賊溪
流為斷俘馘狎至盡奪所掠子女輜重賊敗竄匿山谷
王安民竟死於前賊氣大沮猶分其徒復出龍泉掠萬
安侵太和睥睨廬陵乃檄張旺逆之永陽任思定邀之
桃林上下首尾夾擊而戴應奎中捍太和先後俱以捷
報許彭復鳩宿賊健鬪者八千餘人闖廣而南廣郡先
被牒有嚴備賊不能前盤礴躑躅於大庾信豐之間四

出以撼山寨度賊勢感矣密結知義者夷賊窟穴携賊友黨且邀其歸而圖之分孽一定賊至桐木崗戴應奎首挫其鋒賊衆若林雖敗方信信然迭出鬪我師任思定麾騎兵繞其後賊不能陳屠殺盈野視王溪之功加雋焉賊走退無所據竟就擒以檻車來正嘉熙初元正月十一日也距賊入贛兩月餘方新山堂落成因念疇昔臨汀夷荒別穢之艱嘗作新堂取賈琮平賊故事扁以清平及來領贛威望無以壓難俾民罹寇虐無狀有

覲猶幸撲滅早庶幾箸鹽荷飯佩犢帶牛復見太平之
舊而消烽灌燧使田里無愁歎之聲是固拙守之所自
喜者則取汀之堂名復揭於贛為宜雖然痛定思痛則
今日之事直幸而集爾余嘗揣三十年來已往之跡自
羅李不靖惟許俊龍泉黃土一捷甚偉中間顧以招安
為第一義使姦邪生心如地塵隨掃隨生迨王金部泐
擒鄧寇留直院元剛擒鍾寇而石龍太傅古城三寨參
錯於寇所出入之衝峒民之不敢動者十數年來者夫

創寨本意輕調兵出舒寇無所忌而動黃曾因之效尤
生孽當路者一切以煦濡涵貸為事出爵賞奸捐金買
靜後循前謬牢不可破幾何其不誨盜哉余始至規營
阨塞處屯精銳三千人虎視洞口聯結隅總密察潛制
使其動則不得出出則不得歸既聞於朝矣未報而許
彭之變起四顧百短呈露寮吏切切耳語謂必敗乃公
事三邊孔棘甲兵錢穀之間廟堂正爾應酬叫呼不能
遽徹臺屬郡佐亦被朝命方雜然出冀成事余孤立一

意憑虛運掉以希一勞永佚之福則其遂濟登滋不謂
之幸而集得乎思舊聞南安退校語謂前此陸梁等耕
夫耳蓋陷於姦人之穽至死不悟而來者積玩無所創
故其從亂也輕姦人造謀必怵愚賤單獨之夫出名首
事而陰顛進止於行間相載而歸不饜不止卒又推首
事者出要我市招否則詭託於義執戮獻狀官吏甘其
欺幸無事姑縻以爵首者僭盜之賞從者味盜之腴此
盜所由蔓也今茲反招從捕彼亦無得有喪造謀者死

首禍者誅從亂者勦篁叢蒲澤氣奪膽落有以成官府
尊重之勢矣潢池弄兵飢寒所迫單車撫定用輯民散
昔人非不武也若怙頑喜亂伺隙興戎俾下人有輕上
之萌長此安窮故余因堂成輒書昔所聞今所行之詳
以告後之君子俾知所以靖我民者噫自居於弱不思
所以自強之道而欲媚人以求安皆侮之招亂之階也
豈獨峒寇為然哉余建安李華實夫也嘉熙元年四月
既望記

牧齋程伯強遷墓記

寶慶乙酉十月乙酉程寅仲孟敬遷牧齋先生之柩葬於崇仁鄉鶴鳴山之麓初牧齋無恙時某嘗芒鞋相從自山莊過公前所塋石井岡公曰是吾容棺之墟也余夙嗜郭璞書苦於貧不能得佳城姑存是以待來者余官章貢聞公歿且葬則移書以公所為余言者告孟敬孟敬復余書曰寅仲之貧猶先君印取頰拾經營暮年而克襄大事若改為之須少暇始能及是耳越三年余

歸里中每與孟敬談及前事未嘗不流涕頰感以為是
不可安一日過余津津若有喜色扣之則曰得地矣孟
敬之志亦可悲矣夫余與孟敬為卅角交志相得道相
合也而孟敬連枉場屋竟未能取一第為親榮而親之
亡也力貧攻苦求以承其志者若恐其不得安焉孟敬
之志亦可悲矣夫遷有日廼為識其日月於幽若牧齋
行事則有國錄李公之銘在

跋

跋章少機詩

辱示詩編何其富也東坡先生嘗云眉山道士李伯祥好為詩如夜過修竹寺醉打老僧門要自可愛然一聯之外無傳焉少機警句既為李公子經拈掇而又欲盡出其餘傳於人視李道士編矣巨編奉歸三券助刻梓之費

跋袁元量竹齋漫存詩

孟子曰誦其書讀其詩不知其人可乎某生晚不及識

竹齋表公嘗見章泉老先生言公之詩氣和韻遠當入江西後派比得竹齋漫存一編讀之竊獨愛其與弟元德安樂窩詩有莫春浴沂風雩詠歸氣象是可以知其人矣雖然竹齋所存蓋與西山對峙固有不待詩存者

跋吳士剛詩

詩三百篇雜以小夫賤隸之作而夫子蔽以思無邪蓋先王之澤也王澤竭而後之詩駁矣遺物絕俗者其辭誕憤世嫉邪者其辭激慷慨功名者其辭夸流連光景

者其辭靡是故君子貴養其辭之所自出吳士剛父子
皆嗜詩有樵隱遺藁楚山狂吟氣豪辭壯如出一律亦
甚可喜矣更能於前輩所謂發穠纖於簡古寄至味於
淡泊者涵茹沉浸而放於辭則至矣士剛以為如何

跋楊伯傳詩後

前輩謂作詩必此詩定知非詩人近世宗晚唐者則以
體物切近為工以寄興高遠為忌而或者謂後山好處
如參洞山禪不着正位是果何說邪楊兄伯傳留意於

詩亶亶迫人矣試舉似水翁瑞陽使君若有一轉語幸
以見告當相視一笑

跋趙寺丞公茂詩

公茂宰衡山時軍府急符下無虛日作邑者酬應不給
而公茂彈琴賦詩公事都了今集中所錄多衡山詩也
時余贅倅長沙得公茂所寄吟藁其間佳處竊以為深
厚如懶庵峻潔如紫芝清切如仲白蓋兼儒藻宗英之
長乃到此久之為好事者持去廬陵彭叔東忽以所刻

吟藁甲乙帙來不啻魯之得寶玉大弓輒書其後且識
余喜

跋宋常父詩後

作詩如學道時至自純熟平夷而有遠思淡泊而有餘
味則至矣余聞之東山先生者如此今以告常父

跋石溪漫志

古人纂言記事或本諸故都遺老之所睹記採諸退卒
老校之所傳誦蓋謂文獻之不足徵則得於聞見之可

信者猶當傳也而况親見前輩多識往行叅會稽粹如
黎君是編者其可無傳乎司馬文正公修通鑑實挽劉
道源同事近者陳止齋病史官不宿業而薦王明清輩
可任史職皆以其博物洽聞可與考訂古今事耳石溪
老矣方友梅於嶺趾哦松於藍田學問延迤日大以肆
他時有作宋一藝者將以網羅舊聞其不舍石溪必矣

跋李梅亭浮香亭說

程虎卿為予言翁吉父居市而不為市之道有宋清之

風蓋儒而遁於醫者也因出李公國錄浮香亭說示余
余讀之竟曰萬物爭春而梅花盛於風饕雪虐之際衆
芳炫晝而梅香發於參橫月落之時蓋幽人之貞逸民
之清也吉父能領此則對梅可無媿矣

銘

硯屏銘為曾幾伯作

彼美石兮宛有玉質自然而文是化工筆雪霽月明水
落石出幻成剡溪移來赤壁劫火洞然孰藏於密曾子

得之寶用無斁仁知所樂動靜不失君子比德溫文簡
栗玩而忘義是亦尤物曾子識之中有悟入

安分齋銘

大鈞塊坳品制萬殊鵬背摩雲龜尾曳塗夔則不足
虵則有餘窮通豐嗇工拙知愚造物何心分量爾拘宰
相歇後將軍人奴夫子轍環終老匹夫冶銅弄臣飽死
侏儒原憲肘見窮栖繩樞達人觀其中石如嗟世之
人役知劬劬效尤畫虎助長續鳧為鼠發機為雀投

珠曾不却顧不資其軀吾儕樂天厚養燕需患不自
信鏤之坐隅

息軒銘

心者善根人以私蔽憧憧往來與物俱靡故心之危當
以靜觀大學教人息焉乃安方其息時室虛宇定如彼
而狂如是而聖舜跖善利堯桀是非在吾目前瞭然無
疑擇善必明守善必力憤如悱如斃而後息如從息入
以不息終之德之純與天同功

以時與大星輝人其區既去方其息而室蓋空其以是
 必資善射大以爲慈動動去來與而射休好以是爲吉
 則欲其慈操誠以天子之德其德老臣夫其德亦三德也
 其德在生則其德在死也夫德之在人其德在其中也夫
 表善不帥德不食其德也夫德之在人其德在其中也夫

欽定四庫全書

漁墅類藁卷六

宋 陳元晉 撰

祭文

祭雷知院孝友文

嗚呼執政大臣調一四海平則稱衡和則稱宰疾惡已甚相軋以私恩怨往復不平所基嗜事求快若然一奏其傷實多不和之咎能平能和唯公德全參柄鈞樞人無間言坯冶一陶簫勺羣慝朋亡包荒無反無側化工

密庸庶物露生顯仁藏用無功無名胡不顯面永綏宗
社言畫其繡言秣其馬舊遊阡陌將假之光後進考德
將熏之香東門祖帳籩箚未洗云何奄忽邦國殄瘁如
某晚出實竊賸殘公辱知教愉愉歡顏飢驅官拙自拔
無術公辱從吏篤契相恤有來訃聞心折涕零遠縛一
官薄奠莫親公今已矣言猶在耳誓少自見毋負知己

祭孫提刑文

嗚呼君子邦家之光善人天地之紀不必計其或進或

退或仕或已苟其歸然而存則皆有補於世忽山頽而木萎羗觸目之殄瘁哀哀孫公金堅玉粹瞻前修其已邈維絕學於將墜厲之躬行博之講肄強為善兮不倦哀人窮兮由己公爾忘私義不謀利蓋粹然樂克之好善而挺然曾子之弘毅某之衰老公不我鄙湘濱為寮情好洽比凡言語之相勉曰力行乎好事我隨牒而南馳不見公者三禩每惠問之渠渠必傾倒於肝肺近走一介訊公興止疑回鴈之杳然而公已一疾不起矣彼

蒼者天何遽至是有子垂髫無父誰子有母垂白無子誰侍愛我公者所以痛哭而流涕我知公心有不謂是公方貶恩先姪後子豈以子故賞恨于地棠棣之華孝養不匱公與母訣而尚有弟惟是賢者殞背而彫零則吾黨為之奪氣小人無所憚君子無所倚公論誰與之扶持斯文誰為之興起則公云亡蓋重乎他人之死此某之慟哭固不獨弔公之私與夫識我之義也有酒盈樽有散盈簋一奠莫親老淚如洗

祭何尚書異文

堂堂月湖老成典刑德超人羣而德不形知周事變而
知無名載笑匪怒執義若爭難進易退達可則行包荒
納污中有涓涇察密精緻行之寬平曰介而通曰和而
清求之當世名公巨卿流或徇俗激或矯情何足以齒
大雅之英摘髭科第自其妙齡策足華要逮于晚成德
業久大聲實蜚騰少留步武可柄樞衡浮雲富貴何視
之輕言畫其繡為桑梓榮繩軌里中非義羞稱如彼在

洛司馬端明梯接後進位貌不矜如彼在頽六一先生
山暉川媚藹然風馨或薰而良或聞而興如何奄忽卷
無歌聲睽懷壽雋心折涕零某當晚出龍門獲登辱知
辱教義篤情親齒牙之論委曲提擎文字之飲從容講
評松高羅施柳苑蜩鳴淒其一夢俯仰成陳惟公不朽
鄉社簋劔夫復無憾歸哉佳城哀哀吾黨獨行衆衆誰
歟訂頑誰歟息黥輻車夙駕不殞者靈辨香束芻尚歆
此誠

墓碣

文溪先生致仕大夫陳公夫人黃氏墓碣

先君文溪先生諱凱字仲高世占籍撫之崇仁曾祖光
道祖耕鄉里稱善人宣政間以財雄號陳樂二家父命
世有隱德嘗從龍溪汪公藻陵陽韓公駒尚書孫公覲
得詩文關鍵晚與德閑吳公曾敬齊吳公鎰月湖吳公
異為詩社簡肅林公栗作尉主學登門三請乃出直學
事先君其第三子也生紹興辛未十二月初四日娶同

邑善士黃君寅之女生紹興壬午十月十五日子男二人長元晉登嘉定四年第朝請郎前差知融州次夢薦同元晉舉于鄉後更名元白入太學女三人長適林天休表策文林郎南恩州軍事判官羅夢昱孫男四人少潛蚤世純中同祖懷祖女孫五人四乙娘許嫁鄉貢進士羅章未行而卒四二娘適程約四三娘適曾次魯酉女細娘未笄先君生而端重不妄言笑少長讀書穎悟能自尋繹師教之外直學深器之鄉校月試先君論在

選中時陳公剛館故齋覆校諸卷獨謂先君所論有識
趣且令諸生傳誦為矜式先君於羣獻精微之理世道
興衰之故古今人物議論之本末研究精到講析貫穿
平日不自表暴退然似不能言者為諸生辯說至夜分
則泉涌風生聽者興起無倦容數竒連枉乃不能得一
舉至元晉兄弟涉場屋即日棄去筆研日以奕碁自娛
樂元晉隨牒江浙遠走嶺海皆迎侍就養蓋後元晉塵
忝二十年至紹定辛卯十一月初六日而先君卒享年

八十有一又後七年至嘉熙丁酉正月十八日而先妣卒享年七十有六先君中該大禮登極慶壽恩封贈至朝請郎先妣安人先君懇款誠實表裏洞然不知有世間所謂機械隱譎事與人交薰然其和使人親之久而不厭至義有不當然者臨事一語不相徇生平足跡不一詣富兒門雖鄉貴自慶弔外無往來獨篤於故舊之誼死不相背負開門受徒咿唔終日不問家有無泊如也閩內事皆先妣任之米鹽酒醯儲貯細碎箱篋匕筋

次序整比皆有法度歲時享祀必躬必親姻戚將迎聚會不以約廢禮或急難旬貸時隨力周之先君喜市書解衣脫簪無吝色居間緝績紉綴至晚年不輟蓋能以勤儉相先君而先君賴之自適者初先君葬于縣東本原或謂土薄非便及是得卜於惠安鄉神前渡之東溪山之原將以十二月朔庚申合窆焉惟不肖孤大懼不克自拔負考妣教無以塞顯揚之責他日尚當追緝行實求銘於世之大手筆以表於墓姑識歲月藏之幽云

嘉熙四年前葬七日孤哀子元晉泣血謹識朝奉大夫
直寶謨閣前知潭州主管湖南安撫司公事項寅孫填
諱

墓誌銘

節幹迪功陳公墓誌銘

余頃里居受徒有同姓生恕者來學袖出其叔父圖南
書謂恕少孤叔父育且教之既長矣大懼聞見寡陋俾
從先生游庶幾得竟所學余歎曰富而知以義方淑其

子則益佳余未識君而心義之間歲一登寶蓋則道出
君之門帥其子若姪盛服遮迎邀致留款酒間抵掌劇
談道其平生拮据捋茶以有此家室處鄉曲人情良窳
不齊委曲周旋無不得其心米鹽麻菽疆畝細碎區處
皆有方畧不壟斷不圍奪而印取頰拾以晉致豐故居
之久且安余又歎君之才周於用而顧狹施之使遇具
眼有勢力如張公定叟辛公幼安者獨不能使之驅馳
自見乎庚寅之寇余避地鍾陵鄰君所寓過從尤密時

寇所過鄉閭惡子襲其跡而動發人窖藏燬人室廬其
毒烈於寇寇去株連送官者相望君語余曰此數也彼
何責焉追惟經營締創之艱而所遭若是然似亦無足
芥蒂吾生所涉多逆境中間強弗友者狺狺相向危機
交發旁窺為惴率常屈於下而直於上畸於人而偶於
天蓋不為物先迫而後應故處險亦夷耳世間得喪乘
除禍福倚伏何嘗少假扣吾囊底餘智歸補葺之未遽
不如舊也余味其言又歎君識趣度越流俗蓋有與道

暗合者既而聞君整比舊緒興仆植僵之餘倍他日且營第宅闕麗壯觀頤指氣使百爾新美付二子以家政而方羊林壑日飲無何為況甚適也戊戌春家僮至長沙則聞君病不起矣亟遣書弔之越明年十月其孤專介蹕千里持迪功郎新衡州衡陽縣尉陳成甫之狀來求銘余不得辭則叙余所以知君者而摘成甫所狀書之君名鵬飛圖南其字也世居崇仁之魯步曾祖惟覲祖儷父能百皆鄉里善人君生而偉岸志尚磊落音吐

鴻暢不類常兒長而幹蠱用裕事親無違禮父嘗病革
公誠孝激烈割股以進竟以壽其親十餘年同氣十人
二兄一弟皆早世門戶之責叢於君君撫孤卹嫠使男
有室女有家既又舉貲產平分之無毫髮私族黨戚友
緩急扣門不以在亡為辭尤於儒者傾倒子姓孫枝蘭
玉競秀厚幣隆禮館髦士以誨之已多嶄然露頭角於
庠序間者仁福皇太后錫類恩拜君初品官配鄧氏封
孺人齊眉偕老人榮之有薦公於京湖制閩之節幕謂

君老猶堪器使公笑不答二男子愈師臯三女子來申
張穆方應諧其壻也穆兩薦于鄉八孫得一得聲福孫
慧孫引孫三則女也君生於淳熙戊子卒於嘉熙丁酉
十一月之乙亥己亥十一月之某日葬淨居之原距所
居一里而近銘曰

殖家之肥而人莫非爭道於巖而心則夷故能享素封
而壽且耆眼中山兮全而歸保爾後兮慶無期

致政司法樂公墓誌銘

公諱大章字聖錫姓樂氏其先自國初侍郎公史而下
支派四出分合莫得而詳而籍崇仁者皆其裔也曾大
父韶武大父倫父光國皆不仕娶鄧氏封孺人先公一
年卒子男四如珪如愚如玉如川孟仲皆早世孫男四
中周用萬里孫女二吳友龍其壻也幼未行曾孫男女
二以淳祐辛丑六月二十日卒享年八十有二諸孤將
以壬寅八月庚申窆于崇仁鄉根村雷渡而謁銘於余
因念庚子之夏余歸自長沙問里中老成人安否則歸

然獨存如公者纔一二數既見劇譚道舊言語精神不
見有衰憊氣余為之喜中間梅亭侍郎李公招客登樓
公在焉余怪其步履飲啖似不如舊未幾則聞其病且
不起嗚呼鄉里尊行稱善人者彫落殆盡矣余視公隔
三四輩行兒時聞長老言崇觀間陳樂二家以財雄歲
時冠蓋往來甚昵交契蓋有自來而余弟婦則樂出也
故與公交忘年銘焉得辭公少志進取讀書過眼輒成
誦淳熙丙午待補國學弟子員明年試不偶即日棄筆

硯曰人生貴適意吾豈無以自適耶乃經紀疆畝檢校
困廩勤入儉出而豪取智籠之事一切寘不用故家肥
而人無斃且能推所餘以濟不足士以貧病告解衣推
食無吝色初寒雨雪起視閭巷有閉門炊烟不起處遺
薪米恐後與人交油油翼翼意篤情親薰然其和也視
其門內則繩度整齊上下肅睦如一淑其子以學尤篤
厚幣聘名士從之游故武博饒公誼其選也諸子亦各
矜奮有聲庠序燕居諸子侍必叩所業進否應對愜意

則津津喜色見顏間曰吾可以老矣晚年增築旁舍甚
廣工堅材良丹粉猶濕而煨于寇公不為戚即湖山別
墅居焉初湖山為榛莽樵牧之區公巧發天藏芟薙營
築遂為負郭名勝處喬松修竹回合蔽虧燠室涼臺幽
麗閒靚客來留款竟日賦詩飲酒不盡歡不止梅亭嘗
扁其閣曰碧明而賦之詩公至是曳杖屨領孫曾賓送
日月於其間而終焉亦能適其適矣紹定辛卯以東朝
慶壽恩官初品夫婦同日拜命子孫奉觴為壽齊眉愉

愉人艷為善之報昔梅亭將漕成都辟公隆州法曹漢
陽守胡公行為別駕臨發時聞公賢亦以節幕招公公
方有以自適不屑也嘗戒子若孫我死必蒸嘗我於湖
山之閣銘曰

生稱善人兮宜于鄉錫命斯皇兮壽而康湖山蒸嘗兮
死不亡利爾後人兮妥其藏

廣東主管帳司元公墓誌銘

廣東運司主管帳司元公仁伯長余十五年折輩行與

余交游最款密事有不可語他人者必以語余開口見肺肝無隱情余臨事不敏有疑或質於公公沈思細籌不易攸言動中機宜余心服之之官問塗一日袖巨編過余曰君嘗遊嶺其為我疏飲膳藥石護養之宜人情物態應酬之故余纖悉為書且賀之曰番禺軍府臺聞鼎峙然仕者舊多逐臭尸素之病如公廉操幹局當有知公者公必自此升矣別去兩年聲籍甚無挾白戰得使長破白之削諸臺方將從更其後而公壬辰五月二

十八日死矣嗚呼以公之尊生敬事懷竒好修而竟止
此哀哉其孤方越明年十一月二十日奉公柩葬于長
安鄉池頭梅坑之陽且句余銘余知公深不辭公薦於
鄉名燾以避景憲太子諱改名璫其先自汴來為撫之
崇仁令家焉因占籍茲邑曾祖寄庵先生堯輔學行有
聞祖端父可久皆善人公於書無所不讀過眼終身不
忘屬文深婉有味善論事剖析利害如辨白黑登戊辰
進士第初李公琪得公省闈策大喜謂不意草茅有此

議論蓋公素所長者初筮潭州湘鄉主簿遇事直前疑
然自立有豪民奪其侄之地而誣以他事郡委公定奪
豪民因公客以貨誘公公不動卒直其事公去官其姪
積百緡邀謝諸塗公不受而教以應變事長之道樞帥
安公丙聞其賢羅致幕下邑令與尉表裏為姦利安公
命公核狀公知邑民病之發其姦使不得留尉懼以白
金求哀於公公還其書與金而卒不白其罪人謂公處
令與尉兩得其宜至今湘鄉人能誦簿賢也再調澧州

司法參軍攝令澧陽里正有以溺死婦誣旁溪民家為
奇貨者勘驗無實公謂當反坐里正後令至卒如公言
決之里正怙終訴之郡下邑聚檢無異辭訴之憲下郡
聚檢所差鶻弁與公有雅故移書幾導意後令求賂公
不答其人竟誣溺者有傷事上聞後令已死刑寺以罪
公與檢官俱罷公笑曰吾從得罪猶是失出決不能入
人罪以梯榮也既入廣漕幕時循梅南雄患盜最久諸
郡請濟師狎至南荒枯瘁郡縣重足而立懼以積逋違

戾公彌縫其間通融調度下無乏興上無苛責二使者
亟稱其才死之日趙公師楷哭之哀調卹其家極至公
處鄉閭接親朋薰然其和使人樂親附之而排難解紛
視人由己有烈士之風至於居官壁立崖絕不可干以
私僚寀非其人不屑與交或至面責其過使得位而行
掉鞅功名之塗必不肯睢睢盱盱同流合污懷祿全軀
如今之士大夫嗚呼以公而竟止此哀哉公得年六十
有二娶羅氏男一人方女五人長適邵佖次四壻則李

序黃質胡渡吳泰也後澧州錄事參軍泰鄉貢進士孫男各一人皆幼銘曰

才之生世其無意耶才不及顯其有命耶是司命者其無知耶道之好還其將昌其後而大所就耶

黃彥遠墓誌銘

余乙亥丙子間開門受徒黃朝瑞來學與之游居覺其氣質凝重課試文字亦穩律余心喜之從容叩其疇昔所從則起而曰家君少篤學胡公元衡為郡文學時以

巨題試諸生家君以詩出奇押窄韻得句為首選經史
子集皆手自點勘病時文乏典則取省監程文數十篇
鈇黃批抹皆有關鍵日夜為朝瑞講說然嘗恨夙無師
承凡所造悟皆心自尋繹得之慊然不自以為足故遣
朝瑞從先生游余乃知南溪為人大槩如此後二十有
七年其孫鱗卿補充太學弟子員又見其鄉人為余言
鱗卿年五六歲入小學周夫人憐其幼公曰子弟凡事
皆可遲惟讀書一事不厭早扶攜左右觸事輒誨之所

以教鱗卿者猶所以教朝瑞也既入上庠人以為南溪種學種德之報南溪方進鱗卿而誨之曰太學多士所聚重厚淳薄色色有之汝往取友必端毋詭隨進學必力毋自畫余益知南溪有識趣如此壬寅十月六日則聞公死吳得年七十有二越二年甲辰十二月十六日壬午朝瑞奉公柩葬于所居南二里大池原先塋之右鱗卿狀公之行實來曰鱗卿父子事先生有年矣知先祖莫先生若乞賜之銘余不能辭公諱鍾字彥遠鄉人

稱之為南溪先生曾祖某祖某父某以孝弟力田世其
家公幼穎悟不羣嗜學如飴至天文地理瞿曇老子稗
官小說之書無不通解對客口誦至數百言不休風簷
燈案蠅頭細字雖晚年猶把玩不倦鄉遇飢饉勸施不
倦郡守每委公董視取予多寡一析以理富者樂于糶
貧者安于糶上下晏然如樂歲庚寅之寇臨川崇仁為
震大家奔遁遷徙鄉毗所在嘯呼公曉以理法聯以保
伍遏亂萌鋤兇孽環公鄉數十里恃以無恐事平有籍

以補授者公不以為功也他如去里胥之蠹興陂池之
利訟平其爭役寬其期凡可以利衆及物者劬勞畢力
不憚也然皆出于中心之誠然非干譽非要利其接姻
戚交鄉鄰中無城府懇懇悃悃人亦樂親之或以非意
相干笑談排遣無藏怒無宿怨人之有善稱之不容口
聞人過失必為掩覆隱匿且曰傳訛未必爾鄉里稱善
人非耶娶周氏子男二人長即朝瑞次朝美先公兩年
卒女一人胡彌大其壻也孫男六人德卿次即麟卿翼

卿鯉卿新卿翔卿女三人長歸傳夢得餘幼銘曰
教行於家庭行暴於鄉鄰古人之所謂吉士善人不在
其身在其子孫尚適觀其有成

吳文瑞墓誌銘

公姓吳號其名文瑞其字其先自宣州來占籍撫之崇
仁曾大父適大父朴父淑皆潛德不仕公娶豐城陳氏
子男一人曰霆發女二人適鄭叔憲袁復孫男一人曰
熾女孫一人未笄以寶慶丁亥二月十七日卒享年七

十有八其孤將以四月之乙酉葬于縣西青雲鄉甘田之原從治命也余視公為鄰為親為丈人行知公為深寔發以銘請義不得辭崇仁吳氏族大而文公服襲見聞加以天資穎異讀書過眼成誦下筆輒數十言少習詞賦既而曰壯夫不為也改習書學自為尋繹不師故常處題立說人每異之久乃服其工到蓋幾韓公所謂大怪大好者試一再不偶則殖田疇新屋廬闢圃而蔬鑿池而魚不復齒場屋事即所居之西扁曰桂堂日夷

猶其中凡浮屠老子之說神農華陀孫思邈之術郭璞
呂才之書靡不通究為人講說脉貫縷析纚纚可聽與
族人之言若德相似者五人更為菜羹之集或詩或碁
以自陶寫竟登壽考亦無憾矣公氣剛志銳少年直謂
功名唾手可拾稠人廣坐論事說理正色雄辯無阿順
回護世間有難處事公視之特易易耳使得尺寸柄輔
其志以行紛可使解難可使排也間闕無成自負益耿
耿不安交不苟悅里之富有力貴有勢人所爭趨者公

弗峻絕亦不狎親也嗚呼狂易大言矯激為異皆士之
病也而近世士習遇事蓄縮隨聲附和氣力稍出已上
則覩覩佻佻俯首帖耳甘心為之下畧無毫髮生意者
聞公之風亦可少愧矣銘曰

事左而志方身蹇而氣剛其坵可夷其人不亡百世而
下視此石章

吳公墓誌銘

吳公次周名輝撫之崇仁人其先自宣州來曾祖某祖

某父某世為士家公娶熊氏則雷州使君某之孫也子
男二人曰應符曰應則應則先公六年卒女六人其壻
曰蔣特立管鑑孫琳鄒某方必中黃京孫男二人宗元
宗範女四人歸郭鈴黃墳餘尚幼曾孫女一人紹定四
年正月十九日卒享年七十有九以其年三月二十八
日葬長安鄉石下之原公宿所營度眼中山也公少而
孤蹢蹢從二兄後不齒家事一意嗜書欲自立累試場
屋不利則投筆焚研閉門息交尚友方外習內視納息

之術澹然若與世相忘者歲量先疇所入以為日用之
度僅僅自給不為蘊利多藏計獨厲其子以學隆師市
書雖費不憚公既屏居簡出里閭多不識其面余與公
之子節夫游亦未嘗獲接公談嘉定辛未待對集英一
日或邂逅節夫侍行彷徨蘇公堤上余愕然揖謂公胡
為乎來公曰應符之齒壯矣而未有以厭吾望方規試
上庠而病焉墀懼其躓而護之偕來余切歎其百念灰
矣足不出閩而蘄其子之有成至輕千里不為難亦可

尚已旅舍往來款語數四公每言生平涉世多艱官府不能無罣誤以不辯自明鄉鄰不能無欺侮以不較自正疆畎不能無侵奪以不爭自定清坐靜觀自覺吾味差永余以是益心敬公蓋有見到處不可及也嗚呼今之人譎觚以示夸掉磬以求勝鈎距以矜巧圍奪以自肥者視公所為不詆之悞則譏之拙然宿禍生孽多以自斃者又安能壽而臧全而歸如公稱鄉里善人耶余罔罔憂服中亦何能文節夫再三以銘請辭不獲則為

之銘曰

世途爭熾心地夷式安且壽全而歸尚永厥後視此碑

騰錄舉人臣范翔集

騰錄監生臣周謨揚

詳校官庶吉士臣瑚圖禮

主事臣呂雲棟覆勘

欽定四庫全書

漁野類稿卷七

宋 陳元晉 撰

五言古詩

別王筍何鍊師

東山楊先生
有序贈之

軒軒黃冠師，胄出水曹後。
流風尚詩癖，聖處坐參透。
褰裳紅塵外，心賞山水秀。
渾融入芒屣，字字遺氛垢。
雲霧巧裁縫，冰雪工刻鏤。
編成着山巖，光怪射牛斗。

誠齋已古人，文字上無古。
雲龍渺相從，傳家有文武。
異

聞斬一面渴予心獨苦龍門快先登羨子賞音遇廖師
抱長材彌明吐竒語牽聯千載名政以韓子序君從蕭
灘來我向贛水去饑驅我漫出可耐塵土汙雲山固招
君底事闖城府秋淒君且歸我行方出戶稻梁亦何味
茯苓自堪煮何時扣白雲借我一坐具

梅

吾敬林隱君終老梅花鄉孤山足佳處不願白玉堂古
來貧賤交富貴渠相忘歲寒誰古心搖搖桃李場

竹

吾敬王子猷傲俗獨愛竹行止必與俱情義均骨肉雲
龍求友心上下亦相逐彼哉絕彞倫乃戒桑下宿

遊羅浮寶積寺

晴峰膏秋容遠騎駐春脚長風載之游清月此旅酌眼
高天圍小語暖雲氣薄神仙邂逅親導客以笙鶴

再用前韻

半生夢羅浮世事縛兩脚仙泉有誰何生客那得酌君

詩挹其腴水味從此薄清遊天所裁望極南飛鶴

有感

寒聲戰梧楸風色歲行暮誰念天涯人貂裘敝塵土一
飽亦易營局促良自苦安得八駿蹄駕言觀玄圃

和留粹中將游南華之什

南來佳山水清淑如三吾何必二水間獨有八境圖秀
水饑可餐清淪渴可斟頽頽飛霞佩鞞弄明月珠心閑
鷗許知日遠鴻與徂蓬窻若局促畧取山川娛是間有

意趣逢人輒周諏一舍兩叢林半點塵埃無頓漸非二
門凡聖同一區見佛心即了迷者直非夫冥心休外觀
來此同僧趺

壽嬾庵趙先生十首

更生青藜杖長吉古錦囊豈無芝蘭馨終少蒹葭霜精
深師友漸磨琢金玉相凜此宗姓傑高掩漢與唐
曩時吳畏齋槃槃極宏毅今時葉水心表表負經濟公
游二老間聖處心獨契人物方眇然甚矣夫子似

皎皎疇昔心
睠焉本根計
一鳴驚萬喑
獨醒閱衆醉
勇指非種鋤
有膽竟成事
彼哉稱國師
千載有餘媿

醫國藥萬金
補袞線五色
誰令落江湖
刺史六百石
衆萬溝壑瀕
援手公一力
平生富青州
關心豈官職

嘉師固秉彝
祥刑盡生德
惠文恣彈治
此意誰復識
雨露既天覆
刀劔亦俗革
活人不言功
所願長我國

王氣鬱東南
兵塵莽關洛
事會豈有極
祇恐元氣弱
折衝樽俎餘
欠着一諤諤
如公胡不歸
儒用魯何削

垂弧正大夏明炳肖火德仙源毓英靈帝賚扶社稷恩
波溢西江釀作壽觴碧一飲千斯年福與宋無極
書生棲大廈燕賀媿無從嵩高之嘉頌何以祝我公一

節貫歲寒願似南山松下有千歲苓嘗許氣味同

開濟平生學忠精一寸心時危添白髮意遠寄清吟河

洛風埃滿江湖歲月深眼明天柱壯濡淶對渠斟

楚望環宗嶽湘源遠派浯山川鍾氣異宇宙要賢扶晚

遍朱軒轍春饒綠野腴遙知初度日歌舞沸重湖

七言古詩

朱明洞天

南來大舶凌空浮卸颿試畧羅浮秋胸中無機神仙喜
筆底光怪山靈愁山泉夜作糟床滴風松閃丹青旗色
招我三啜玻璃觥峰頭飛上八千尺星微月壯海茫茫
蓬萊仙袂遙相望銅龍夜吼風霧香石橋跨空河漢長
千巖笙籟奏清曲萬樹醴露如天漿金鷄海底初刷翻
雲擁扶桑一枝出羣仙拍手嘆絕竒坐中相顧屬誰筆

阿翁曾是夾日飛公孫請賦五色日

田家謠

長年飯不足背裂赤日中忍饑不肯懶辛苦求年豐今
秋幸一熟天意亦憚窮庶幾債可了或有餘粟春團樂
共妻子糠粃一笑同焚香答天賜力作人何功君不見
前年三百青銅米一斗又不見去年蕨根掘盡不充口
妻孥長恐不相守敢擬如今蘇息否

和馮眉州九日無酒韻

蜀日曠曠風淒淒有美人兮愁楚羈白衣不來負佳節
士窮使我增歔歔錦鞵屢踏秦關月寶刀尚染健兒血
尋思往事玩浮雲目送孤鴻互明滅醉鄉廣大無何有
無事唯當學犀首不應來弔獨醒魂却嫌閒却持螯手
吾儕臭味草木同但須多植寒花叢遇花開時即重九
天豈教人樽屢空

贈符藥朱道士

君不見許旌陽飛符走劔蛟龍降一朝功行滿僊籍寶

冊金丹來帝旁又不見孫思邈玉函方出千金藥棲遲
猶作地行僂良以活人恩施博要知天地德好生鬼謀
客邪胡由乘有符有藥解濟世此心即可通神明桃椎
耳孫樂虛靜符水能靈藥能聖呼雷麾電縛魑魅二豎
三彭俱聽命困者以醒病者甦孳孳予豈為利圖梓人
作室橐駝樹治民相國非殊塗降魔要豎大法幢起死
要下黃昏湯更頻物色合誰屬請起江湖登廟堂

胡文昌和東坡子由彭城月詩併錄澹菴新州

以所和見示索和

澹菴眼似坡仙高眇視軒冕如秋毫忠臣要作社稷計
那知平陸生風濤當時蓋亦輕餘子富貴轉頭真逝水
汗青不朽姓字香百世聞風尚興起函關正要封泥丸
金陵王氣開龍蟠一書乞借尚方劍搢紳環睨心為寒
要扶鑿駕還都汴鼎鑊在前顏不變低頭辦了着南冠
歛手笑還丞相板飛鳶跼跼古錦山氣老益壯窮益堅
銀河流空月照地肺肝洞作冰玉看緬懷坡仙亦大好

詩比離騷興香草持杯滿滿賀素蛾嶺海百年逢二老
聞孫趾美德不貧清文高節猶前人何當佳話重拈出
只慙授簡梁園客

採蓮

春山懶婦忻晝眠門前女伴邀採蓮含嚙行過寒煙浦
瞥上蘭舟悄無語尋花不見花深深見花不折空愁心
停橈看花紅更膩却自低頭照秋水娟娟沙際月一痕
催歸幾棹菱歌喧葉底忽逢花並蒂折歸月下乞郎看

楊南仲寓湖

紛紛市道交翻覆雲雨手不如清風與明月情分却於
人耐久夫君不受塵土污湖上結茅誰與處坐中只着
風月我有客敲門卿且去涼生几席影沉杯困眠醉舞
相追陪此時一笑真莫逆中邊洞徹無纖埃須知箇裏
非久計時來攜手青雲裏蓬萊山頂廣寒宮放出清光
滿天地

上姚贛州鏞壽

伏審黃鍾唱子嵩嶽生申紛燕賀之偕來祝龜齡
之難老莫抒善頌隄賦長歌庸以發君侯之雄心
抑以見吾黨之矚望儻蒙笑鑑榮幸不貲

東南之鎮曰會稽扶輿清淑拱帝畿千巖萬壑氣盤礴
更有壽檜天與齊托根后土閱千古黛色蒼皮天一柱
鍾為人傑堪棟國恰似嵩高降申甫君侯胸中百萬兵
年未四十俄專城精神滿腹秋水瑩談笑兩頰春風生
崎嶇贛右三百里蛟鱉垂涎波浪起溯流張膽作風帆

信如王尊乃勇耳脫畧邊幅柔凶頑解除苛嬈綏創殘
喚回和氣豁氛祲事有至難談笑間人口如碑沸傳誦
帝曰吾徒得君重天風吹下紫泥封趣入班行作儀鳳
大夫何以假守為真除屬厭民所期虎頭岌業要彈壓
凝香森戟聊娛嬉璇杓插子日南至黃鍾飛灰雷出地
崆峒春早梅已香釀入黃堂壽觴裏醉來含笑看吳鉤
龍光夜半干斗牛關河北望令人老忠臣心與天為謀
潢池正爾兵不弄又說邊塵時瀕洞籌邊筦鑰寧無人

知待人豪為國用貂蟬冠高劔挂頤丹青正與綠鬢宜
碧油幢下白羽扇貔虎百萬惟指麾雍容傳檄定三輔
頸縛單于歸釁鼓手扶鑿駕還東都宮殿千門總如故
摩挲與問金城柳頗嘗見有此舉否策勲飲至未央宮
腰下懸金印如斗萬年觴捧月氏頭虎拜稽首揚王休
功高福與宋無極紫樞黃閣三千秋

上劉計使

水心吾師今昌黎如椽巨筆光虹蜺先公潛德粲碑版

却恨不識嵇中散九苞五彩丹穴雛不巢阿閣翔海隅
南來隻影方自笑天假之逢挹光耀一寒頓坐春風溫
賤子亦許扳龍門子期九原不可叫箏琶紛紛不同調
明公派自南軒來祇今砥柱狂瀾回一麾兩節嶺南北
盡是周程舊敷歷書生彊附善類心莫道冶躍非祥金
偶然短簿令公喜上下雲龍固其志山谷昔見蘇長公
自此小草依長松牽聯名字香聞素未必今人不如古

和胡文昌嘉禾篇

鄮山東翼帝王州使君來自白鷺洲下車三月課最優
賦辨不擾訟不留哦詩卧閣政令修和聲上暢天畀休
六丁下執早魃囚蠻琛航遠歸懷柔向來瘡痍稍稍瘳
雨應六月如膏流有禾雙穗來西疇觀者喜氣同春浮
老父再拜千騎頭此帝所賚非人求三邊未靖哀虔劉
向來根本慮甚周安得賣劍都買牛豐年一飽百不憂
轉頭西風催斂犂鼠雀亦覺歡啾啾更令北望煙燧收
鐵衣更戍休葵丘富民有詔封千秋我生誰嘆命不猶

黃鷄白酒相獻酬老翁市井兒嬉遊擊香仰祝十二旒
垂拱萬年百祿適偉哉姬旦忠國謀艱難民事陳嘉猷
僊人飛空白玉輶霓旌來下風颼颼手持五綬遺君侯
瑞圖合命椽筆修晉之東序方天球連理木頌那得儔
午憲香篆銷金虬和公詩罷茶七甌

五言律詩

代餞轉運判官趙帑轄

今代漢宗英如公不數人清標高嶽柱和氣藹湘春宣

室思才子甘泉欠侍臣平生劉子政晚節更精神

憔悴湘濱客懷哉有此逢二星欣照映三月愜遊從公
事如羹沸歸心似酒釀從今殊出處別語且從容

和蔡鐵窻韻

鐵牕詩價遠應是到鷄林修月有妙手伴雲無出心調
高追郢曲意古和虞琴觸境勿多語希聲是大音

峽山

帆落榕根暮禪扉半尚開逢僧如舊識問我幾時來潭

靜鷗眠穩雲深猿叫哀
篝燈看碑石今古半蒼苔

嚴陵市

暝色低平野霜風放霽天
買杯逢竹所索句立梅前
山曲雲歸寺溪寒水帶烟
茅簷聽殘雪愁絕擁衾眠

帥節留先生兩年粵服氓
獠安之一日疏十宜

歸欲袖手板還丞相言者
猶不之置上命以釐

廷之祿解印東歸門生臨
川陳元晉援後山送

坡仙故事至惠之海豐而
別作詩四章云

手疏宜歸十心知昨夢非鴻冥空費弋鷗舞早知機風
急推潮落雲閑剩雨歸攀轅多少淚海岼濕斜暉

描畫終無說歸來豈不榮事難工拙較我自去留輕過
眼風波惡懸空日月明人生只恁是孤鶴九臯聲

拙無諧俗韻老眼獨相竒寒谷遲春到東風盡日吹身
將三尺律心不一毫欺公與梅花外南來誰我知

木種十年計苓培千歲根三生疑宿植九殞志酬恩遠
送竟須別百懷難具論任安窮自分義不辱公門

餞余倅鼎叟官滿東歸

丙年同佐牧相與最情親乘月登樓夜隨風步屨春報

來陞轉速歸去召除新一劔舊肝膽持將問大鈞

時以平寇

轉兩官且有任滿陞擢之命

晚步

鼓鐘燈火後袖手過欄干素月空中寂踈星竹裏看溪
毛行步濕潭影古心寒此意我方適亭亭夜未殘

過桐廬縣

嚴陵耕釣處清淑故依然樓館危臨水人煙近倚天客
行桑下路農墾嶺頭田遲我風帆便津頭更覓錢

雪作

簾捲虛堂曉兒童笑語譁恍疑開月窟渾是散天花竹
裏聞清響江邊看玉槎訪梅乘好興着屐過鄰家

送鄧帥參文舉得南雄守歸

庚子
元日

風流耆舊傳悃悃靜無華來重青油幙歸乘皂蓋車離
筵傾柏葉客路看梅花聞有南來信門前逐騎譁

雨後

忽雨乾坤變將秋氣候寬林亭欣濯濯柳岸渺漫漫一
飯飽無那連村枕可安舉觴屬明月急雨放雲端
一雨郊原足神功不作難向知天道邇今幸物情安童
稚沾衣走人家傍戶看翻令五六月春意轉江干

喜雨

六月乃有此豐年定可書真成天雨粟到處水成渠攏
橈香連畝汗邪載滿車所忻同一飽未用嘆無魚

輓饒武博二首

方客戎幢右俄旌墓道傍
堂虛空老桂星冷落魁芒留
世程文樣傳家奏藁香
鄉評偕李謝雖死有幽光
內集儕甥舅同登齒弟兄
忘年情好密開口肺肝傾
恍爾同醒醉傷哉隔死生
朔風吹老淚哀些不成聲

代挽寺丞吳公

國事須才急如公亦古人
江淮老麾節俎豆哭軍民
圖憶籌邊舊官傳結綬新
朔風吹老淚泉路濕寒燐

贈歐陽承務

談天多巧中名在士夫間行遍西江路來遊南嶽山病
侵心緒懶窮慣面皮頑莫說功名事祿書從捲還

挽德慶涂守二首

九京嗟已矣今更孰如君律已嚴三尺活人寬一分清
名寒蜀雪嘉誦藹南雲杉柏風淒切黃陂原上墳

鄉粉生也晚嶺外偶同寅齒我子姪行情如兄弟親不
嫌同幕辯要作一州春滿澗多題字回頭更愴神

欽定四庫全書

漁墅類稿卷八

宋 陳元晉 撰

七言律詩

題羅浮山中閣

大海漫天駕葉舟來登中閣問仙游
泉聲急瀉三更雨雲氣深藏六月秋
霧濕中天龍出洞日騰滄海蜃收樓
禪床靜數惛惛息身在清都最上頭

七月初十夜對月呈留粹中

人間寒信到堦蛩天外清商入井桐孤館無人同夜月
長年作客又秋風想君局促重簾底似我棲遲逆旅中
何事人生苦拘束得閑來此一樽同

越王臺

南州勝觀越王臺天與詩人醉眼開雲漠漠邊蕃路遠
水茫茫處海潮回人家一半藏烟樹往事千重問石苔
料得清秋尤好在一樽重約月明來

慶塗權尉三首

袖中光焰吐青蛇獻策軍門鬢未華豈是輕身探虎穴
要將赤手拔鯨牙向來筆研渾無力此去功名正未涯
小試柳營新號令六花排陣寂無譁

歲月適於赴壑虵功名政要及年華平淮猶自須裴度
釣渭那能老子牙舞袖巧懸嫌地褊酒杯相屬記天涯
期君酣戰秋風裏鼓率銜枚陣不譁

朝憂猛虎夕長蛇弔戰場文憶李華自笑病來寬帶眼
那能老去植幢牙如君政合登東閣顧我惟堪老北涯

金定四庫全書
卷八
賓主秋風南浦路旗鈴好聽捷音詳

王推官載酒來會於逍遙堂

路入煙蘿杳靄中良宵一笑美人同壺觴盡攬平湖月
絃管時飄別岸風三宿未忘緣境勝一燈相對坐詩窮
姓名要共青山久看取當年玉局翁

喜雨上頂帥

精祈三日竟成霖一瓣心香格帝歆苗若遂枯無此水
粟將暴貴湧於金時方多壘農為急公在三湘澤已深

自媿侏儒叨一飽願推德意答天心

李徽猷病後許賞蓮而未酬小詩發一笑

僧夏分來一榻涼愛蓮更擅水雲鄉
露融初日敷朝采雨捲涼颿送晚香
天女羣參青葉髻水仙爭護紫荷囊
一絲不掛根塵淨莫恠先生久覆觴

和留少微豐湖懷坡僊韻

弔古誰翻楚些歌百年陳跡愴懷多
春風草綠松根寺

夜雨燈寒宰堵波

松根朝雲所藏面峙浮屠坡詩所謂夜燈勤禮塔中仙者是也

老鶴

舊曾陪杖履閑鷗今尚護煙莎憑君莫憶當時事惆悵
人間春夢婆

倉檄出惠陽督諸邑捕蝗

古來傳說驅蝗法近歲驚聞田有蝗無耐吏饕甘地惡
何辜民病重天殃秋風要滿扶犁望夏日寧辭走檄忙
高廩更令無雀鼠使星尸祝幾爐香

題新昌蔡尉比春園四時載酒亭

蔡家亭子錦江涯長約春風作歲華拚却百年渾是醉

莫教一日不開花稱觴隨獲慈顏悅問字時容客語謹
我若有園如箇樣肯將雙鬢抗風沙

紀遊再用前韻

松篁一徑夾長蛇雲錦重重肅九華長夏飛泉傾石眼
半空懸磴啄簷牙要知酒興并詩料不在山巔即水涯
記取松間休喝道山靈應怕俗聲譁

過南安道中

暑塗明發正愁予佇立風簷氣不蘇擬戴星行方叱馭

誰驅雨至忽隨車豈憐行道渴欲死直恐良苗涸且枯
早覺南來鹽米賤趁墟歸去總歡呼

火乘金伏勢方驕天地圍爐萬物焦那信炎蒸天六月
却聞優渥雨三朝頓添秋思生庭樹頗覺春痕漲市橋
分我清風陪獨夜又愁明月渺難招

得主管仙都之命

頭銜清甚管仙都吏責全無出有車老去心情酬應懶
閑來親友往還踈每嗤人作囚山賦莫勸儂通光範書

只把窮愁博強健世間得失本乘除

擊毬口號戲陳統制

築塲千步柳營東樽俎精神坐折衝
星彈流空驚過鳥霜蹄追電捷游龍
身輕鞍馬人如畫膽落猩鼯穴已空
歸去翠眉環玉帳釵兒多乞錦纏紅

題顏秀才夔詩編

延年一印付聞孫文采風流今尚存
生長見聞誠叟里交游唱和澹菴門
苦思那有酸寒氣妙斲渾無斧鑿痕

問子何為暗投璧令吾端欲監降旂

和項帥交帥印招十二邑令韻

時七令
皆宗姓

同時製錦七宗英更有珠聯五舜臣
矚望諸賢皆邑最和衷一語見情真
方時艱棘難為政隨事斟量可及民
緩急之中權闔闢政須不失本心仁

信國魯夫人挽詩二首

詎有陳平解久貧共看眉案久如賓
從夫榮荷西清橐承祖恪共南澗
蘋玉樹庭前雙使節金花天上九恩綸

繡衣綵服今非昔忍見堂堂雪後春

曾是王珪坐上人孰知孟母德無鄰長懷就養板輿日
一笑能回花縣春詩感棘風知痛苦歌翻薤露亦酸辛
送車千兩瑤塘路奔走無從愧負薪

判府大帥督參寶謨戶部先生持漕節來長沙
繼陞帥守追惟平菴先生分教是邦越四十有
九年而多士尊仰說服如一日廼市地立祠以
慰士心祠成門下士陳某拜手稽首而詩之曰

佩璐騎麟返帝旁
屐痕所在尚芬芳
泉行地脉家家井
月到天心處處光
模範百年垂藻泮
蒸嘗千古奉桐鄉
教忠况有無窮澤
衮衮湘流一派長

羅浮山多有道人
倚嶽巖為室
僅可容膝引泉
貫其間以供烹濯
鑿山種豆
人不滿二畝可了
歲計油然自得也
為予言夜深月明
時有虎觸
戶山前後多黃鸝
終日峴睨可愛
與留粹中各

賦詩

山家境界無畦畛住處隨人意所便澗汲巖棲忘世界
石耕畬種盡天年時驚虎觸柴扉月長聽鶯啼綠樹烟
不信却無人種杏知從何處覓神仙

甲申乙酉丙戌四過釣臺有感

三年四過子陵臺老我風霜兩鬢催望見雲山心已愧
夢登釣石眼為開乾坤清氣長如許鐘鼎元勳安在哉
近百年來幾帆過登臨多是覓官來

上留提刑壽

恭惟某官八葉傳芳六蓬紀旦先中秋之一
日有來箕昴之躔占南極之二星俶照斗牛
之分永錫難老不謀同辭某夙荷優容尤深
贊慶祝萬有千歲之眉壽託百十二字之詩
歌掣電過之下風幸甚

中秋清絕冠秋天間氣生賢得月先一念來從金粟洞
三生曾伴赤松仙繡衣踏遍江湖上線履催歸雨露邊
且別崆峒朝帝去它年來拍廣成肩

展開南極老人圖是處青煙鵲尾爐
秋露九原淪厚澤
春風一道泳康衢
萬金藥散疲羸活
三尺刑清怨嘆蘓
只此陰功誰比大
中書有考可酬無

和鄧帥參追和東坡雪韻

學舞腰支束素織
回旋似怯曉風嚴
飄窻浙瀝暗投壁
洒研紛披凍著鹽
應有飲羔圍暖帳
誰憐饑雀啅寒簷
凭欄獨聳詩肩瘦
對立西山玉幾尖

破寒有喜報晨鴉
忽送詩筒雪賦車
占歲便同天雨粟

寬憂解遣筆生花瓊枝夸麗羞陳苑玉樹爭妍比謝家
臘白纔呈春已動扶桑霽影曉相义

柳子厚解崇賦扶
桑鞞轡而相义

和陳守喜雨詩

埵鶴無聲口舌乾誰驅雷雨遍千山頓蘇赤地千里旱
特出黃堂一念間澤物功深無德色豐年願遂有歡顏
為霖祗恐思賢佐千騎東隨鳳詔還

誰念東南膏血乾文移督迫積如山平時素號鑊湯底
不雨豈逃溝壑間民病向來猶在耳天威此去不違顏

從容宣室如前席乞與枯麥生意還

再和涂宣義喜雨

郡邑同寅禱早乾風霆來會雨千山真成雨粟從天下
只在為雲翻手間神不素餐無愧色農期一飽足歡顏
豐年酒熟雞豚社二老從今請往還

挽劉金部

忠清家法見聞中蜀產凋零又到公抗偽一門誠節誼
明倫數語寂精忠郎潛勇退聲名重使傳賢勞惠利豐

時事方艱人物眇可堪收淚灑悲風

贈劉賢良

十二書言天下事氣如菁直語加道誰當心耻四郊壘
子獨眉攢萬國愁刺手拔鯨何倜儻劇談捫虱自風流
悠然且作新豐醉定有人能說馬周

安撫徽猷郎中被召欲東賦詩見志乃以得歸
閑退為喜門人小子知先生之心也輒和嚴韻

用暢高風

莫管聲名草木知人生待足是何時興纔盡處須回棹
塗到迷時漫泣岐老我昨非今似是笑渠小黠大還癡
山林晚覺中多味不恠高顏只茹芝

輦叟揮車倦且歸釣遊舊處足娛嬉客懷自分三宜去
世事那無一可為晝日高眠甘茗乳秋風清飲飽尊絲
何當為背奚奴錦收拾潭州歸後詩

和柴大監留郎中遊鬱孤及喜雨之什

冰壺清對玉衡秋臺府同時盡勝流南國恩波如海闊

西江和氣接天浮山川真借兩賢重翰墨仍為八境留
見說九重思魏笏書帷更欲學君疇

農畝皇皇望有秋肩頰背裂汗衣流疲暈不得一飯飽
我輩應慚多食浮烏尾督逋無迫遽鼠牙有訟怕淹留
兩君一念回天速天雨看看粟滿疇

韶石使君年丈扁舟過我於松桂林敬哦小詩
留為一日款就寄石洲主人以發千里外一笑

也

十五年前會五羊都門再別九年強君榮韶石州麾出
我窘文江縣債償人世能消幾離別征塗何用許奔忙
梅前菊後風光好且為儂留共一觴

黃雀長行萬里餘煩渠就寄數行書常懷李白詩無敵
莫怪韋郎跡也踈玉節榮光何恨速石洲風物正闌渠
同年相逐雲龍處應念吾儂乃一豬

七言絕句

春日

金旛勝裏喚春歸，却後新正八日期。
紅紫莫嫌春較晚，開遲應是落還遲。

題曾審言所寓僧舍梅屋

作屋延梅更鑿池，是花最與水相宜。
橫斜清淺黃昏月，畫出孤山兩句詩。
傾蓋知心兩玉人，竹君邂逅更情親。
能同此味花君子，來共團樂一笑春。

十五早獨夜

月轉庭除夜未央坐看梧影上東牆
金風玉露方清絕
只欠探枝桂子香

雨作寒聲落枕邊攪人愁緒不成眠
非關獨夜難排遣
為怕秋風在眼前

題西齋

唔咿一室特蘧廬要讀人間未見書
快著先鞭問前路
西崑玉府富珍儲

梅仙峰

文陛無階寄履聲
驂鸞有路學仙靈
長安宮殿今何處
祇有梅峯萬古青

謝童帥幹送滴酥

滴成詩句巧相粘
料得堂深凍未收
剪水染雲天上手
何因得見玉纖纖

入庾嶺

梅花迎路客平安
此是江南盡處山
霜月正高花下飲
酒闌長嘯過梅關

寧都上元有作

一覺翛然已五更
窓橫梅影月偏明
年時記得嬉遊罷
猶為梅花夢不成

賣薪買酒舊家時
人樂昇平豈自知
節物如今不堪說
丘墟滿眼更啼饑

刃劍尤為花木災
園林不貸一株梅
呼童徧縣無尋處
安得成叢插燭來

即事

庭草茸茸書帶碧
檻榴粲粲舞裙紅
靜觀物化機無息
又轉薰琴一信風

田間

高田拍拍水連塍
早稻將齊晚稻深
閉糶人家爭發貸
豐年也有債相尋

鴈字

超然聖處過張顛
整整斜斜落照邊
好寫人間不平事
叫開闔闔為箋天

題陳氏鏡湖

賀監歸歟百不求問天只覓鑑湖秋
夫君賸有閑田地鑿破天慳得自由
水上觀心即是禪此心如鏡察天淵
一塵不著風波靜俯水何慚鏡裏天

過南雄調木倅

抱經居士
之子也

句法清嚴舊有聲親傳詩學自趨庭
漆丁只解供耘耔不似盧仝獨抱經

道遠胡為至此哉班行見說正須才多應詩興清無奈
特為觀梅故一來

別留少微兼呈玉堂先生

天涯萬里同為客先自悲秋更送君歸路明朝好蕭索
一聲鴈斷幾重雲

客中未醉難為別別後無書但寄詩俗物眼前誰可意
思君無奈鬢成絲

四海弟兄能有幾平生臭味許誰同遙知夜雨連床際

騰錄監生臣俞錫玉

騰錄貢生臣黃琮